

ინტერპოლის, როგორც მთავრობათაშორისი ორგანიზაციის როლი
საერთაშორისო ურთიერთობების განვითარებაში – ორგანიზაციის
მიერ განსაზღვრული ინსტიტუციური და ტექნოლოგიური ჩარჩო

ლევან თექეთუმანიძე

დოქტორანტი

საქართველოს ტექნიკური უნივერსიტეტი

სამართლისა და საერთაშორისო ურთიერთობების ფაკულტეტი

levantek@gmail.com

ORCID iD: <https://orcid.org/0009-0003-0381-216X>

DOI: 10.52340/splogos.2026.01.02

აბსტრაქტი

წინამდებარე სტატია მიმოიხილავს ორგანიზაცია „INTERPOL“-ის სტატუსს გლობალური მმართველობის კონტექსტში და აღწერს, თუ როგორ ჩამოყალიბდა ორგანიზაცია ტრანსნაციონალური უსაფრთხოების მნიშვნელოვან აქტორად XXI საუკუნეში. მიუხედავად იმისა, რომ „INTERPOL“ კლასიკური საერთაშორისო ხელშეკრულების საფუძველზე არ დაფუძნებულა, იგი პრაქტიკულად სრულფასოვნად ასრულებს მთავრობათაშორისი ორგანიზაციის ფუნქციებს და აღიარებულია სწორედ ამ სტატუსით სახელმწიფოთა უმრავლესობის მიერ.

სტატიაში განსაკუთრებული ყურადღება ეთმობა „INTERPOL“-ის ტრანსფორმაციას ქსელურ და მონაცემებზე დაფუძნებულ ინსტიტუციად. თანამედროვე ტექნოლოგიების, მათ შორის ბიომეტრიული მონაცემებისა და გლობალური საინფორმაციო სისტემების გამოყენებამ მნიშვნელოვნად გააძლიერა „INTERPOL“-ის შესაძლებლობები. ორგანიზაცია წარმოადგენს გლობალური მმართველობის მნიშვნელოვან შემადგენელ ნაწილს, რომელიც აყალიბებს უსაფრთხოების მიმართულებით საერთაშორისო თანამშრომლობის ახალ მოდელს. ეს მოდელი ეფუძნება სახელმწიფოთა შორის ნდობაზე დამყარებულ

კოლაბორაციას, ცოდნის გაზიარებასა და საერთო პასუხისმგებლობას, რაც თანამედროვე საერთაშორისო ურთიერთობებში უსაფრთხოების უზრუნველყოფის მთავარ საფუძვლად გვევლინება.

საკვანძო სიტყვები: გლობალური მმართველობა, ტრანსნაციონალური უსაფრთხოება, საერთაშორისო საპოლიციო თანამშრომლობა, საერთაშორისო ორგანიზაციის სტატუსი, ინსტიტუციური ტრანსფორმაცია

The Role of INTERPOL as an Intergovernmental Organization in the Development of International Relations - the Institutional and Technological Framework Defined by the Organization

Levan Tektumanidze

PhD Student

Georgian Technical University

Faculty of Law and International Relations

levantek@gmail.com

ORCID iD: <https://orcid.org/0009-0003-0381-216X>

Abstract

This article examines the status and functional evolution of INTERPOL within the context of global governance and international relations. It argues that INTERPOL has emerged as a key transnational security actor in the twenty-first century despite its atypical legal foundation, as it does not originate from a classical international treaty framework. Nevertheless, it performs core functions of an intergovernmental organization and is widely recognized as such by the majority of states.

The article places particular emphasis on INTERPOL's transformation into a network-based and data-driven institution. The use of modern technologies, including biometric

data and global information systems, has significantly enhanced the capacities of INTERPOL. The organization represents an important component of global governance, shaping a new model of international cooperation in the field of security. This model is based on trust-based collaboration among states, knowledge sharing, and collective responsibility, which together constitute a key foundation for ensuring security in contemporary international relations.

Keywords: Global Governance, Transnational Security, International Police Cooperation, Status of an International Organization, Institutional Transformation

შესავალი

წინამდებარე სტატია მიმოიხილავს ორგანიზაციის – „**The International Criminal Police Organization (ICPO-INTERPOL)**“ სტატუსს და მის წვლილს გლობალური მმართველობის კონტექსტში. ინტერპოლის, როგორც მთავრობათაშორისი საერთაშორისო ორგანიზაციის, როლის გააზრება განსაკუთრებულ მნიშვნელობას იძენს გლობალური უსაფრთხოების წინაშე არსებული გამოწვევებისას. XXI საუკუნეში უსაფრთხო გარემო სულ უფრო მეტად არის დაკავშირებული ტრანსნაციონალურ დანაშაულთან და ტექნოლოგიური განვითარების შედეგად წარმოქმნილ ნებისმიერ ახალ რისკთან. სწორედ ამ კონტექსტში „INTERPOL“ ჩამოყალიბდა საერთაშორისო თანამშრომლობის ინსტიტუციურ პლატფორმად, რომელიც აერთიანებს სახელმწიფოებს საერთო მიზნებით. ასევე, მნიშვნელოვან გარემოებას წარმოადგენს ის, რომ წლების მანძილზე ორგანიზაციის სტატუსი განხილვის საგანი იყო – შეესაბამებოდა თუ არა იგი (კლასიკური გაგებით) საერთაშორისო ორგანიზაციის სტატუსის მატარებელ ორგანიზაციას. ამ სტატიაში კიდევ ერთხელ არის წარმოჩენილი ის ცოდნა და საერთაშორისო აკადემიური დებატები, რომელიც ადასტურებს ორგანიზაციის – „The International Criminal Police Organization (ICPO-INTERPOL)“ საერთაშორისო სტატუსს და მის მონაწილეობას გლობალური მმართველობის პროცესში.

წინამდებარე სტატია აგებულია იმგვარად, რომ წარმოაჩინოს „INTERPOL“-ის **ორი ძირითადი** მიმართულება და მნიშვნელობა: 1) ორგანიზაცია წარმოადგენს გლობალური მმართველობის ქსელურ ინსტიტუტს, რომელიც აძლიერებს სახელმწიფოთა თანამშრომლობას 2) ყურადღება გამახვილებულია „INTERPOL“-ის **ტექნოლოგიურ ტრანსფორმაციაზე**, რომლის ფარგლებშიც ორგანიზაცია იქცა მონაცემებსა და ციფრულ ინფრასტრუქტურაზე დაფუძნებულ წამყვან საერთაშორისო პლატფორმად.

„INTERPOL“-ის ამ ორი მახასიათებლის გაანალიზება საშუალებას მოგვცემს, რომ შევაფასოთ იგი, როგორც საერთაშორისო ურთიერთობების მნიშვნელოვანი აქტორი, რომელიც აყალიბებს უსაფრთხოების ახალ მოდელს გლობალური ურთიერთდამოკიდებულების ეპოქაში.

საკითხი აქტუალობას განსაზღვრავს რამდენიმე გარემოება: 1. საქართველო არის ინტერპოლის საერთაშორისო და გლობალური მმართველობის შემადგენელი ნაწილი. ამის გათვალისწინებით მნიშვნელოვანია, რომ არსებობდეს აკადემიური მიმოხილვა იმის თაობაზე, თუ რა საერთაშორისო პროცესებში მონაწილეობს საქართველო უსაფრთხოებისა და დანაშაულთან ბრძოლის მთავრობათაშორის პლატფორმაზე. „INTERPOL“-ის გლობალურ მმართველობაში მონაწილეობასა და მის სტატუსზე ქართულ აკადემიურ სივრცეში ანალიტიკური მასალის ნაკლებობაა, შესაბამისად ეს სტატია თავის წვლილს შეიტანს დარგის შესახებ ცოდნის გაზრდასა და ცნობიერების ამაღლებაში. 2. წინამდებარე სტატიის თემა ერთმანეთს აკავშირებს საერთაშორისო თანამშრომლობისა და გლობალური უსაფრთხოების საკითხებს – უმთავრეს მიმართულებას, რომლებიც თანამედროვე საერთაშორისო ურთიერთობების დღის წესრიგში ცენტრალურ ადგილს იკავებს. გლობალიზაციისა და ტექნოლოგიური პროგრესისას უსაფრთხოების გამოწვევები სულ უფრო მეტად ტრანსნაციონალურ ხასიათს იძენს, რაც მოითხოვს სახელმწიფოთა შორის **კოორდინირებულ, ინსტიტუციურად გამყარებულ თანამშრომლობას**.

წინამდებარე სტატია პასუხობს ორ მთავარ შეკითხვას:

1. როგორ იქცა „INTERPOL“ ტრანსნაციონალური უსაფრთხოების აქტორად გლობალური მმართველობისას?
2. რა გავლენას ახდენს „INTERPOL“-ის ტექნოლოგიური ტრანსფორმაცია უსაფრთხოების მიმართულებით საერთაშორისო თანამშრომლობაზე?

I. „INTERPOL“ – ტრანსნაციონალური უსაფრთხოების აქტორი გლობალური მმართველობისას.

XXI საუკუნეში საერთაშორისო უსაფრთხოების გარემო სწრაფად იცვლება როგორც ტექნოლოგიური პროგრესის, ასევე დანაშაულის ზრდის ფონზე. საყოველთაოდ ცნობილია, რომ უსაფრთხოების სფეროში არის ახალი, თვისებრივად განსხვავებული და მზარდი გამოწვევები, რადგან დანაშაულებრივი ქსელები მოქმედებენ სხვადასხვა იურისდიქციაში, სხვადასხვა სივრცეში (მათ შორის როგორც ფიზიკურ, ასევე - ვირტუალურ). სწორედ ამ კონტექსტში განსაკუთრებულ მნიშვნელობას იძენს საერთაშორისო ორგანიზაციათა როლი, რომლებიც ხელს უწყობენ სახელმწიფოთა თანამშრომლობას უსაფრთხოების სფეროში. ასეთ ორგანიზაციებს შორის თავისი გავლენით გამოირჩევა საერთაშორისო კრიმინალური პოლიციის ორგანიზაცია – „INTERPOL“.

„INTERPOL“ – „International Criminal Police Organization“ – წარმოადგენს მსოფლიოში უდიდეს საერთაშორისო თანამშრომლობის პლატფორმას, რომელიც აერთიანებს 196 წევრ სახელმწიფოს და ემსახურება სახელმწიფოების კოორდინაციას ტრანსნაციონალური უსაფრთხოების უზრუნველყოფის პროცესში („Interpol“, 2024). ორგანიზაცია თავად არ ახორციელებს დაკავებებს, თუმცა, უზრუნველყოფს ინფორმაციის გაცვლას, ოპერატიულ კოორდინაციას, ანალიტიკურ მხარდაჭერასა და ტექნოლოგიურ ინფრასტრუქტურას, რაც საერთაშორისო თანამშრომლობის პრაქტიკულ საფუძველს ქმნის.

„დღეის მდგომარეობით, „INTERPOL“ წარმოადგენს ყველაზე მნიშვნელოვან საერთაშორისო სუბიექტს, რომელიც ჩართულია ტრანსნაციონალური თანამშრომლობისა და გლობალური მასშტაბის საერთაშორისო საკითხების გადაჭრაში.

ორგანიზაციის სტრატეგიული ჩარჩო (2026-2030) თანამშრომლობის სულისკვეთებას „INTERPOL“-ის ცენტრალურ ელემენტად განიხილავს და მას გლობალური უსაფრთხოების უზრუნველყოფის ძირითად წინაპირობად წარმოაჩენს. სტრატეგიის ხედვა — *“Together against crime”* – ეფუძნება იდეას, რომ თანამედროვე დანაშაულს არ აქვს საზღვრები და სახელმწიფოებს მისი იზოლირებულად მართვა არ შეუძლიათ. ორგანიზაცია პოზიციონირებს, როგორც **მაკოორდინებელი სტრუქტურა**, აერთიანებს სახელმწიფოებს და პარტნიორ აქტორებს **საერთო მიზნისათვის**.

აღნიშნული სტრატეგიის მიხედვით⁶², თანამშრომლობა მხოლოდ ინფორმაციის გაცვლით არ შემოიფარგლება; იგი მოიცავს ნდობაზე დაფუძნებული ინსტიტუციური კულტურის განვითარებას, ცოდნის გაზიარებას, ტექნოლოგიური შესაძლებლობების ერთობლივ გამოყენებას და წევრი ქვეყნების შესაძლებლობების გაძლიერებას. „INTERPOL“, ხაზს უსვამს, რომ გლობალური თანამშრომლობა ეფუძნება ურთიერთდაკავშირებულ ქსელს, სადაც სახელმწიფოები ერთმანეთს უზიარებენ მონაცემებს და ცოდნას, რაც ტრანსნაციონალური დანაშაულის წინააღმდეგ ბრძლის ეფექტიანობას ზრდის. ამგვარად, სტრატეგიული დოკუმენტის მიხედვით, თანამშრომლობა არის არა **დამატებითი მექანიზმი**, არამედ – საერთაშორისო უსაფრთხოების მმართველობის საფუძველი.

ევროპარლამენტის შეფასებით⁶³, „INTERPOL“-ის, როგორც საერთაშორისო ორგანიზაციის სტატუსი გარკვეული პერიოდის განმავლობაში დისკუსიის საგანი იყო. ორგანიზაცია არ დაფუძნებულა კლასიკური საერთაშორისო ხელშეკრულების საფუძველზე და მისი კონსტიტუცია არ გაუვლია ეროვნული პარლამენტების მიერ რატიფიკაციის პროცედურას, რაც ტრადიციული გაგებით საერთაშორისო ორგანიზაციის კრიტერიუმებს სრულად არ შეესაბამება. მიუხედავად ამისა, თავად ინტერპოლი საკუთარ თავს განსაზღვრავს როგორც **მთავრობათაშორის**

⁶² სტრატეგიის ჩარჩო დოკუმენტი ხელმისაწვდომია ამ ბმულზე: <https://www.interpol.int/en/Who-we-are/Strategic-Framework>. ბმულის ბოლოს შემოწმების თარიღია: 12.04.2026.

⁶³ The status of Interpol as an international organisation (2013) – ხელმისაწვდომია ბმულზე: https://www.europarl.europa.eu/doceo/document/E-7-2013-011707_EN.html.

ორგანიზაციას და პრაქტიკაში მრავალი სახელმწიფო მას სწორედ ასეთად აღიარებს.

თანამედროვე შეფასებებით, მათ შორის ევროპარლამენტის ანალიზის მიხედვით, **დღეს აღარ არსებობს** ინტერპოლის საერთაშორისო ორგანიზაციის სტატუსში ეჭვის შეტანის საფუძველი. ეს სტატუსი მნიშვნელოვანია მისი სამართლებრივი მდგომარეობის, იმუნიტეტებისა და პრივილეგიების განსასაზღვრად. საერთაშორისო სამართალში „საერთაშორისო ორგანიზაციის“ ერთიანი და უნივერსალური განსაზღვრების არარსებობისას, „INTERPOL“ წარმოადგენს განსაკუთრებულ შემთხვევას: ორგანიზაციას, რომელიც ფორმალურად არ შეესაბამება კლასიკურ მოდელს, თუმცა, ფუნქციურად სრულად ასრულებს სახელმწიფოთაშორისი თანამშრომლობის ინსტიტუტის როლს.

„INTERPOL“-ის ჩამოყალიბება და ინსტიტუციური გაფართოება განსაკუთრებით აქტიურ ფაზაში შევიდა XX საუკუნის მეორე ნახევარში⁶⁴ და დასასრულს მიუახლოვდა 1990-იანი წლების ბოლოს, როდესაც **ორგანიზაცია ფაქტობრივად გლობალურ ქსელად ჩამოყალიბდა**. 1956 წელს მიღებული კონსტიტუცია, რომელიც დამტკიცდა სხვადასხვა ქვეყნის მაღალი რანგის პოლიციის წარმომადგენლებისა და დიპლომატების მონაწილეობით, საფუძველად დაედო ორგანიზაციის თანამედროვე სტრუქტურას. მიუხედავად იმისა, რომ კონსტიტუციას ხელი არ მოუწერიათ კლასიკური საერთაშორისო ხელშეკრულების მსგავსად სახელმწიფოთა პარლამენტების მიერ რატიფიცირებული ფორმით, მას ეტაპობრივად შეუერთდნენ მსოფლიოს სხვადასხვა ქვეყნები, რაც ნიშნავდა მის ლეგიტიმაციას. მაგ., 1960-იან წლებში „From the original 20 founding members in 1923, there were 50 member countries by 1955 as the Organization rebuilt itself after the Second World War. This map shows the member countries as of September 1962. Changing geographical boundaries of nations, such as the break-up of the Soviet Union and Yugoslavia, led to new nations joining” (ორგანიზაციის ისტორიული განვითარების ეტაპები).

⁶⁴ ორგანიზაციის განვითარების ძირითადი თარიღები წარმოდგენილია ინტერპოლის ისტორიის მოკლე მიმოხილვის ნაწილში: <https://www.interpol.int/en/Who-we-are/Our-history/Key-dates>.

1990-იანი წლების ბოლოსთვის ორგანიზაცია უკვე აერთიანებდა მსოფლიოს სახელმწიფოების უმრავლესობას და ფაქტობრივად დასრულდა მისი გლობალური გაფართოების ძირითადი ფაზა იმ ფორმით, რა ფორმითაც იგი დღეს ფუნქციონირებს. ამ პროცესმა ინტერპოლი აქცია უნივერსალურ პლატფორმად სამართალდამცავი თანამშრომლობისთვის, სადაც წევრობა აღარ იყო რეგიონულად შეზღუდული, არამედ მოიცავდა თითქმის ყველა კონტინენტს. სწორედ ამ ისტორიულ ეტაპზე ჩამოყალიბდა ინტერპოლი როგორც სრულად ინტეგრირებული, გლობალური, სახელმწიფოთაშორისი თანამშრომლობის მექანიზმი, რომელიც დღემდე ინარჩუნებს ამ მასშტაბსა და დატვირთვას.

II. რა გავლენას ახდენს „INTERPOL“-ის ტექნოლოგიური ტრანსფორმაცია უსაფრთხოების მიმართულებით საერთაშორისო თანამშრომლობაზე?

გამომდინარე იქიდან, რომ XXI საუკუნე შეფასებულია ინფორმაციისა და ქსელების ეპოქად, შეიძლება ითქვას, რომ თანამედროვე საინფორმაციო სისტემებმა, მონაცემთა ბაზებმა და თანამშრომლობამ (ინფორმაციის გაცვლამ), „INTERPOL“ აქცია ტრანსნაციონალურ აქტორად და მისცა შესაძლებლობა, სრულფასოვნად ჩართულიყო გლობალური მმართველობის კონტექსტში.

ციფრული დანაშაულის ზრდასთან ერთად ორგანიზაცია აქტიურად იყენებს საინფორმაციო და საკომუნიკაციო ტექნოლოგიებს, ბიომეტრიულ მონაცემებსა და ხელოვნურ ინტელექტს ტრანსნაციონალური საფრთხეების იდენტიფიკაციისთვის. 2025 წლის საერთაშორისო თანამშრომლობის დღის თემად სწორედ „ICT“ და „AI“ საქმიანობაში დასახელდა, რაც მიუთითებს ორგანიზაციის ტრანსფორმაციაზე ტექნოლოგიურად ორიენტირებულ უსაფრთხოების პლატფორმად.

კიბერდანაშაული, ხელოვნური ინტელექტის არაეთიკურად და ბოროტი მიზნებისთვის გამოყენება, ონლაინ თაღლითობა და კრიტიკული ინფრასტრუქტურის წინააღმდეგ მიმართული კიბერშეტევები თანამედროვე საერთაშორისო სისტემის მთავარ გამოწვევებად განიხილება. ამ კონტექსტში „INTERPOL“ საკუთარ სტრატეგიულ დოკუმენტებში ტექნოლოგიურ

უსაფრთხოებას განსაზღვრავს როგორც საერთაშორისო თანამშრომლობის ერთ-ერთ პრიორიტეტულ მიმართულებას.

„INTERPOL“-ის სტრატეგიული ჩარჩო 2026–2030 ხაზს უსვამს, რომ ორგანიზაციის მისიაა „გლობალური სამართალდამცავი სისტემების დაკავშირება და გაძლიერება უსაფრთხო სამყაროსთვის“, რაც მნიშვნელოვნად ეფუძნება ინოვაციური ტექნოლოგიების გამოყენებას: „In the coming decades, technological advances will continue to blur the boundaries between the physical and the digital...INTERPOL’s products and services will evolve to help the global law enforcement community prepare for these transformations.“

ხაზგასასმელია, რომ ორგანიზაციას აქვს კიბერდანაშაულის სტრატეგია - [INTERPOL's Cybercrime Global Strategy \(2022-2025\)](#), რომლის მიზედვითაც „INTERPOL“ კოორდინაციას უწევს საერთაშორისო ოპერაციებს, ავრცელებს საფრთხის დაზვერვით მონაცემებს და აძლიერებს წევრი ქვეყნების შესაძლებლობებს ტრენინგებისა და ტექნიკური მხარდაჭერის გზით. დოკუმენტის სლოგანია – „**Reducing the global impact of cybercrime and protecting communities for a safer world**“, რომელიც ასახულია დოკუმენტის 4 ამოცანაში.

პირველი ამოცანა დაკავშირებულია კიბერდანაშაულის პრევენციის პროაქტიულ მიდგომასთან;

მეორე ამოცანა მიმართულია კიბერდანაშაულის ეფექტიანი გამოვლენისკენ;

მესამე ამოცანა ეხება წევრი ქვეყნების შესაძლებლობების განვითარებას. სტრატეგია განსაკუთრებულ ყურადღებას უთმობს ტრენინგს, ტექნიკური უნარების გაძლიერებასა და მრავალაქტორულ პარტნიორობებს, რაც ხელს უწყობს გლობალური კიბერუსაფრთხოების ეკოსისტემაში ნდობის ზრდას და თანამშრომლობის გაღრმავებას;

მეოთხე ამოცანა მიზნად ისახავს „INTERPOL“-ის როლის გაძლიერებას გლობალური უსაფრთხოების კონტექსტში.

სტრატეგიის დოკუმენტის მიხედვით, ოთხივე მიმართულება ერთიანად ქმნის თანამშრომლობაზე, ინოვაციასა და კოლექტიურ პასუხისმგებლობაზე

დაფუძნებულ საერთაშორისო მოდელს, რომელიც კიბერდანაშაულის წინააღმდეგ ბრძოლას გლობალური მმართველობის მნიშვნელოვან კომპონენტად განიხილავს.

იმ მავალფეროვან ინსტრუმენტს შორის, რომელთა მეშვეობითაც „INTERPOL“ იქცა საერთაშორისო თანამშრომლობის აქტორიდან გლობალური მმართველობის შემადგენელ ინსტიტუციად, ხაზგასასმელია რამოდენიმე (რომელთაც ამ სტატიის მიზნებისთვის მოვიყვან საილუსტრაციოდ):

I-24/7: გლობალური პოლიციის დაცული ქსელი / „Secure global police communications system“

წვერი ქვეყნების სამართალდამცავი უწყებების დასაკავშირებლად ინტერპოლის მიერ შემუშავებულ იქნა გლობალური საპოლიციო საკომუნიკაციო სისტემა I-24/7. აღნიშნული სისტემა ავტორიზებულ მომხმარებლებს საშუალებას აძლევს გაცვალონ კოლეგებთან სენსიტიური და გადაუდებელი საპოლიციო ინფორმაცია მსოფლიოს მასშტაბით უწყვეტად.

ამჟამად ინტერპოლი ძალისხმევას არ იშურებს, რომ აღნიშნული მონაცემთა ბაზები ხელმისაწვდომი გახდეს ისეთი უწყებებისათვის, როგორებიც საიმისგრაციო და სასაზღვრო გამშვები პუნქტებია.

„I-Link“

ყოველდღიურად, ორგანიზაციის წვერი ქვეყნების სამართალდამცავი ორგანოები I-24/7 ქსელის მეშვეობით ერთმანეთში ათასობით წერილს ცვლიან. აღნიშნული მიმოწერის ეფექტური მენეჯმენტი სასიცოცხლოდ მნიშვნელოვანია. „I-Link“ წარმოადგენს უნიკალურ დინამიკურ სისტემას, რომელიც მონაცემთა ბაზების ცენტრალიზებას და მუდმივ განახლებას ახდენს. ეროვნული ცენტრალური ბიუროების ოფიცრებს და სხვა უფლებამოსილ მომხმარებლებს I-24/7-ის მეშვეობით წვდომა გააჩნიათ „I-Link“-თან რომელიც არის საერთაშორისო სტანდარტის საკომუნიკაციო სისტემა, შეუძლია დროის მოკლე მონაკვეთში საპოლიციო ინფორმაციის ინტერპოლის კრიმინალურ მონაცემთა ბაზებში ასახვა და საპოლიციო ინფორმაციაზე რეალურ დროში ხელმისაწვდომობის

უზრუნველყოფა. „I-Link“ ხელმისაწვდომია ინტერპოლის სამუშაო ენაზე (არაბული, ინგლისური, ფრანგული და ესპანური).

„INTERPOL“ წარმოადგენს უნიკალურ ინსტიტუციურ აქტორს, რომელიც აერთიანებს გლობალური მმართველობის, ტექნოლოგიური ინოვაციისა და საერთაშორისო თანამშრომლობის კომპონენტებს. მისი განვითარება ასახავს საერთაშორისო ურთიერთობების ტრანსფორმაციას, სადაც უსაფრთხოება სულ უფრო მეტად ეფუძნება ქსელურ კოორდინაციასა და მონაცემებზე დაფუძნებულ მმართველობას.

ამრიგად, „INTERPOL“ არ წარმოჩინდება და არ პოზიციონირებს როგორც სამართალდამცავი კოორდინაციის ტექნიკური პლატფორმა: იგი ჩამოყალიბდა საერთაშორისო ურთიერთობების მნიშვნელოვან აქტორად, რომელიც აერთიანებს უსაფრთხოების პოლიტიკას, ტექნოლოგიურ ინოვაციასა და მრავალმხრივ დიპლომატიას. მისი საქმიანობა აჩვენებს, რომ თანამედროვე საერთაშორისო ურთიერთობები სულ უფრო მეტად ეფუძნება ქსელურ თანამშრომლობას სახელმწიფოთა შორის, სადაც უსაფრთხოება არის დაფუძნებული საერთო პასუხისმგებლობასა და არა მხოლოდ ეროვნული კომპეტენციაზე.

გამოყენებული ლიტერატურა

1. Calcara, G. (2021). Balancing international police cooperation: The problematic aspects of INTERPOL's governance. *Liverpool Law Review*, 42(1), 1–19. <https://doi.org/10.1007/s10991-020-09266-9>;
2. European Parliament. (n.d.). International police cooperation and INTERPOL;
3. INTERPOL. (2022–2025). **Cybercrime global strategy**: Reducing the global impact of cybercrime and protecting communities for a safer world. <https://www.interpol.int>;
4. INTERPOL. (2025). UN International Day of Police Cooperation 2025: ICT and AI in policing. <https://www.interpol.int/Who-we-are/Our-partners/International-organization>;
5. INTERPOL. (2026). **Strategic framework 2026–2030**. <https://www.interpol.int/en/Who-we-are/Strategic-Framework>;

6. INTERPOL. (n.d.). About INTERPOL. <https://www.interpol.int/Who-we-are/What-is-INTERPOL>;
7. INTERPOL. (n.d.). **INTERPOL and the United Nations:** Priorities for cooperation;
8. TechRadar Pro. (2026, January 15). Massive INTERPOL operation takes down thousands of cybercrime servers worldwide. <https://www.techradar.com/pro/security/massive-interpol-operation-takes-down-45-000-ip-addresses-and-leads-to-94-arrests>.